

荊州府

禹貢荊州之域職方爾雅亦屬荊州周成王封熊繹於丹陽爲楚國丹陽本在漢秭歸縣其後自秭歸徙枝江亦名其地爲丹陽史記秦齊破楚屈匄遂取丹陽是也楚文王始都郢今府北十里紀南城也在紀山之南故又名紀郢平王又城郢而都之卽子囊所言吳師所入者今府東北三里故郢城是桓十三年之荒谷冶父均在府東文十年子西見王之渚宮卽今江陵城定五年子西所保之脾洩與郢都近當在府境莊十九年楚人禦巴人之津卽今枝江縣西三里之津鄉文十六年麋入率百濮所聚之選亦在今枝江縣南定四年楚子涉睢濟江入於雲中睢卽枝江縣之沮水雲中卽枝江縣雲夢也又枝江有羅國

城羅本在宜城楚遷之枝江耳秦爲南郡治所漢高帝元年改南郡爲臨江郡五年復爲南郡景帝二年復改臨江中二年復爲南郡領十八縣在府境爲江陵華容郢枝江高成夷道六縣江陵爲南郡治又高帝置武陵郡領十三縣在府境爲孱陵縣北境二郡均屬荊州部後漢南郡領十七縣在府境爲江陵華容枝江夷道四縣蓋省郢入江陵省高成入武陵之孱陵武陵郡領十二縣在府境仍爲孱陵縣北境二郡仍屬荊州漢刺史無常治後漢荊州刺史治武陵郡之漢壽劉表爲荊州移治襄陽建安十三年劉琮降魏魏盡有荊州之地分南郡枝江以西爲臨江郡及赤壁之敗孫權使周瑜入江陵領南郡太守表劉備爲荊州牧分備江南岸地立營油口領零陵桂陽武陵長沙四郡油口本孱陵縣地備乃分其地立公安縣居之并得魏所

置臨江郡改爲宜都郡十九年吳蜀分荊州武陵零陵南郡宜都均爲蜀有二十四年蜀守將傅士元以公安糜芳以江陵均降吳蜀先主復敗于猇亭四郡復悉入吳吳南郡徙治江南又以武陵郡之孱陵作唐二縣屬南郡分枝江縣置旌陽縣孫休又分宜都立建平郡南郡所領在府境爲江陵枝江旌陽華容公安孱陵六縣宜都郡所領在府境爲夷道一縣晉武平吳大康元年分吳南郡地在江南者立南平郡又改南郡曰新郡尋復曰南郡又省華容縣旋復立又改公安縣爲江安縣水經注定江南罷華容置之謂之江安縣按沈志華容晉大康元年省後復立又江安大康元年立是華容實與江安並立不得云罷華容立江安胡三省言江安爲分孱陵置按公安亦分孱陵置圖經云晉改漢縣公安爲江安殆信然以松滋流戶在孱陵縣境者立松滋縣太平寰宇記卷一百三十二引大流戶在荆土者立松滋縣按咸康爲咸甯然咸甯三年晉武尙未平吳紀之故畢尙書沅改咸康爲咸甯然咸甯三年晉武尙未平吳

荆土爲吳地晉不能於其地立縣今斷爲大康元年平吳以後大康三年作地記以前所立亦不定爲何年或以咸康爲大康之誤亦可按松滋本西漢縣屬廬江郡在今安徽宿松縣北至晉有三松滋一屬豫州安豐郡大康地記所言松滋縣屬安豐郡及晉志安豐郡下所載松滋侯相是也其地在松滋縣屬安豐縣東一屬揚州尋陽郡晉志揚州下所云咸帝初江淮爲胡寇所亂乃於江南僑立淮南郡縣於尋陽郡是也其地在松滋縣屬安帝省松滋郡爲松滋縣屬尋陽郡是也其地在今江西德化縣東一屬荊州南郡大康地記言以流戶在荆土立縣者是也亦見晉志南郡下其地卽今荊州府之松滋縣至咸康中以司州僑戶立南河東郡於荆州松滋遂以松滋屬河東郡方輿紀要不察大康地記之不可以紀咸康也又惑於咸帝僑立尋陽松滋於是荆州松滋爲咸康中與南河東郡同立則誤甚

容縣立監利縣又分華容南境立石首縣於是南郡治江陵領十三縣在府境爲江陵華容枝江旌陽監利松滋石首七縣宜都郡治夷陵領三縣在府境爲夷道一縣南平郡治作唐後治江安領四縣在府境爲孱陵江安二縣永嘉初蜀亂割南郡之華容州陵監利三縣地置豐都爲四縣置成都王頽國理華容

尋廢復故南郡宜都南平三郡均屬荊州而荊州刺史治所晉
初治襄陽後治江陵王敦治武昌陶侃前治沔陽後治武昌王
虞治江陵庾亮治武昌庾翼治襄陽復還夏口桓溫治江陵桓
沖治上明在松滋縣大元二年桓沖為荊州刺史以符堅強盛
欲移阻江南上疏曰自中興以來荊州所鎮隨宜回
轉臣兄溫經略中原因江陵路便即而鎮之今宜全重江南輕
戍江北南平孱陵縣界地名上明田土膏良可以資業軍人在
吳時樂鄉城以上四十餘里北枕大江西接三峽請自江陵移鎮上明從之遂為重鎮王忱還江陵此後
遂治江陵又晉武置南蠻校尉於襄陽渡江後移置於江陵之
方城又南渡後僑立新興郡於江陵縣境領雲中九原定襄宕
渠廣牧新豐六縣咸康三年征西將軍庾亮以司州僑戶立南
河東郡於松滋縣境即割松滋屬之領聞喜廣戚松滋宏農臨
汾永安安邑譙八縣晉末又分夷道立宜昌縣宋元嘉中省旌
陽縣入枝江縣省石首縣入華容縣孝建中割南郡之監利與

州陵同度巴陵郡又省雲中九原宕渠入定襄廣牧等縣又以
廣戚并聞喜宏農臨汾并松滋安邑并永安於是南郡治江陵
領六縣在府境為江陵華容枝江三縣南平郡治江安領四縣
在府境為江安孱陵二縣宜都郡治夷道領四縣在府境為夷
道宜昌二縣新興郡領定襄廣牧新豐三縣南河東郡領聞喜
永安松滋譙四縣五郡均屬荊州刺史治江陵孝建中罷南蠻
校尉府又郢州之巴陵郡治巴陵領四縣在府境為監利縣齊
因宋制惟南平郡徙治孱陵耳梁南郡南平郡河東郡新興郡
均屬荊州所領縣仍宋齊之舊其在府境者亦同惟改新興郡
之新豐縣為安興縣又於江陵縣境置都州領雲澤縣於宜都
郡置宜州領宜都郡所領在府境為夷道宜都二縣宜都即改
晉末所置宜昌縣也於巴陵郡置巴州分監利縣為監利郡屬

又水經注江水東逕宜昌縣北分夷道俱山所立也按之江水所經其地在夷陵西陵峽黃牛山之西與宋齊志之宜昌隋志之宜昌在今宜都境者相去懸絕中間隔今東湖長陽二縣地若合而一之則惑滋甚按隋志清江郡巴山縣下云梁置宜都郡宜昌縣隋巴山在今長陽縣西酈元所言必指此蓋梁既改宋齊之宜昌為宜都復立宜昌於夷陵之西耳酈元卒於孝昌二年為梁普通七年若梁初所置郡縣自可引用惟今東湖江南岸地當為漢夷道地方與酈注分夷道俱山地立縣合若隋志於宜昌下注云有黃牛山則誤合酈注之宜昌為一矣是精於巴山而疏於宜昌也

曰枝江漢以來故縣曰松滋漢高成後漢孱陵縣地晉以後為松滋又為河東郡之聞喜譙二縣曰公安舊孱陵三國公安晉宋齊梁江安西魏公安陳置荊州開皇九年又省孱陵永安二縣入焉曰安興舊為江陵晉以後為新興郡開皇十一年省安興縣入廣牧仁壽初改廣牧曰安興大業初又廢定襄入焉曰紫陵舊為江陵梁置都州雲澤縣西魏為華陵雲澤二縣後周改華陵為紫陵大業初廢都州又廢雲澤入紫陵又以周峽州為夷陵郡統三縣

在府境為夷道縣本舊夷道縣地縣為陳有後梁置此又以後周復州為沔陽郡統五縣在府境為監利縣舊縣也大業末蕭詧之曾孫銑起兵據江陵僞梁王東自九江西抵三峽南畫交趾北距漢川銑皆有之唐武德二年收夷陵郡置峽州治夷陵領三縣在府境為夷道一縣又置江州割南郡之宜昌一縣屬之尋攻宜昌為宜都四年平蕭銑改南郡為荊州治江陵分隋監利縣南境置石首縣唐志石首下云武德四年分華容縣置按隋華容縣本晉宋南平郡之安南縣漢孱陵縣地也晉分漢華容縣置石首縣宋省入華容後周廢華容縣當入監利唐置石首即晉故石首地當為分監利置唐志云分華容欠洽廢紫陵縣入江陵縣於是荊州領七縣在府境為江陵枝江安興石首松滋公安六縣五年荊州置大總管改隋沔陽郡為復州治沔陽領三縣在府境為監利一縣六年改江州為東松州七年改荊州大總管為荊州大都督貞觀二年降為

荊州都督府八年廢東松州省夷道入宜都以宜都屬峽州十七年省安興縣入江陵縣龍朔二年升爲荊州大都督督峽岳復郢四州天寶元年改荊州爲江陵郡峽州爲夷陵郡復州爲竟陵郡乾元元年三郡復故而荊州仍爲大都督府至德以後中原多故襄鄧百姓兩京衣冠盡投江湘故荊南并邑十倍其初乃置荊南節度使治江陵上元元年九月置南都以荊州爲江陵府長史爲尹觀察制置一準兩京其荊南節度使領荆澧朗峽夔忠歸萬等八州又割黔中之涪湖南之岳潭衡郴邵永道連八州增置萬人軍以永平爲名又置長甯縣於郭內與江陵並治三年省枝江縣入長甯縣後江陵尹衛伯玉以湖南闊遠請於衡州置防禦使管湖南八州大曆六年復省長甯入江陵并置枝江荊州至是領八縣在府境爲江陵枝江石首松滋

公安五縣與峽州之宜都復州之監利凡七縣而荆峽復三州均屬山南東道五代荊州梁唐晉漢周均爲荆南高氏地均置荆南軍峽州梁屬蜀唐晉漢周屬南平梁以復州之監利縣屬荊州府境遂無復州地宋爲江陵府江陵郡荆南節度領荆湖北路兵馬鈴轄兼提舉本路及拖夔州兵馬巡檢事乾德三年升石首縣之白舊巡爲建甯縣萬庾巡爲萬庾縣尋省萬庾縣入建甯縣熙甯六年省枝江縣入松滋縣省建甯縣入石首縣省復州之玉沙入監利縣尋復玉沙元祐元年復枝江建甯二縣建炎二年升帥府四年江陵寄治枝江置荊南府歸峽州荆門公安軍鎮撫使紹興五年江陵還舊治罷鎮撫使始制安撫使兼管田使六年爲經略安撫使七年罷經略止除安撫使淳熙元年還爲荊南府未幾復爲江陵府制置使嘉熙元年移枝

江縣治澌澗洲景定元年移制置使治鄂咸淳六年移枝江縣
治江南白水鎮下沌市十年爲荆湘四川宣撫使兼江陵府事
七縣南渡後省建甯縣入石首縣又峽州夷陵郡軍事治夷陵
領四縣在府境爲宜都一縣均屬荆湖北路元至元十三年改
江陵府爲上路總管府十七年升峽州爲峽州路天歷二年以
文宗潛藩改上路爲中興路二路均屬河南河北等處行中書
省荆湖北道所領縣與在府境者均同宋明太祖甲辰年改中
興路爲荊州府峽州路爲峽州府旋降峽州爲州均隸湖廣行
省洪武元年置湖廣分省於荊州府尋罷九年改峽州爲夷陵
州以州治夷陵縣省入屬荊州府荊州府屬湖廣布政司尋改
屬河南二十四年還湖廣又洪武十年以潛江縣改屬承天府

於是荊州府治江陵領江陵公安石首監利松滋枝江六縣又
領夷陵一州州領長陽宜都遠安三縣在府境爲府領六縣及
夷陵州所領之宜都縣凡七縣 國朝因之康熙三年分湖廣
布政司爲湖北布政司雍正十三年升夷陵州爲宜昌府割宜
都遠安二縣屬荊州府乾隆五十六年以遠安縣改屬荊門直
隸州於是荊州府隸湖北布政司鎮守將軍暨副都統領滿洲
駐防兵駐此治江陵縣城南臨大江在府東南者曰監利府南
偏東者曰石首府南偏西者曰公安府西曰松滋又西曰枝江
又西曰宜都惟監利地在江北公安松滋地在江南其餘境地
均跨江南北地勢自西北至東南亘長三百七十里南北廣二
百里府城北近邊距東南界爲最遠西南界次之東北西北界
爲最近

東至漢陽府沔陽州界二百里西至宜昌府東湖縣界
二百里南至湖南澧州界一百九十里北至荊門州界

二十里東南至湖南華容縣界二百八十九里西南至宜昌府長陽縣界二百六十里東北至安陸府潛江縣界九十里西北至荊門州當陽縣界九十里東鄰漢陽之沔陽北鄰安陸之潛江及荊門州當陽其界均詳漢陽安陸荊門等篇茲自宜都當陽東湖界之普通總西南迤百三十里抵江沂江北上六七里渡江至荊門山下又西三十里至文佛山爲宜都東湖長陽界轉而南二十里渡清江西南百二十里至瑪瑙坡爲宜都長陽界轉而東四十里至楊橋山爲宜都長樂松滋界轉而南十八里至黃龍埡爲松滋長樂石門界轉而東南三十里至覃家坡爲松滋石門澧州界又東八十里至石子河爲松滋澧州公安界又東南十八里至界溪橋市有公安南出澧州之路又東南渡牛浪湖三十六里至虎渡河爲公安澧州安鄉界又東南四十二里爲公安安鄉石首界又東南三十里至三汊河爲石首安鄉華

容界轉而東北三十六里渡蛇皮洲藕池口分江支津也又東北十里有石首南出華容之路又東百里至塔市驛抵大江爲石首華容監利界轉而溯江東下二十里爲監利華容巴陵界又東南百里至荆河腦洞庭湖水入江處也又東北二十里至白螺磯爲監利巴陵臨湘界又東北六十里至界牌爲監利臨湘沔陽界此府境之界也府境山之在江北者分自黃柏河與沮漳間一支曰白沙老溪與滄茫溪間山自遠安當陽東湖接壤之三界嶺分支南迤爲當陽東湖界山之西白沙老溪出焉西南流行東湖入江之水也山亦西南入東湖境轉而東南入宜都境傍江東南迤盡於上焦巖石岡子等山江水轉而東北流處也府境山之在江南者則有清江南支自宜昌之長樂東北迤至楊橋山分爲二支南支南迤爲松滋長樂界山又東

南池爲松滋石門澧州界山南盡於澧北盡於澧東盡於澧流
相通之支津北支北池入宜都縣境至高白巖又分爲二支東
池者入枝江松滋境北盡於江東盡於江與澧間支津其名者
有起龍誥賜等山蓋漢志之澗山也北池者盡於宜都城清江
入江處也此府境山之大略也江水自宜昌府東南流至荆門
山下入宜都境行七十里南岸入枝江境行二十里南岸入松
滋境行三十里北岸入枝江境百里洲分江流爲二行五十里
江流復合行二十里北岸入江陵境行二十里南岸入江陵境
行二十五里至御路口府城南埠也歷新淤窖金江心突起等
洲行四十五里南岸入公安境行七十里南北岸均入石首境
行二百一十里北岸入監利境行三十里南岸入監利境行十
五里南岸入湖南華容境行二十里南岸入湖南巴陵境行百

三十里南岸入湖南臨湘境行六十里北岸入沔陽境此江流
之在府境者也其入江之水北岸則有沮水南岸則有澧水油
水皆名水也沮水自當陽縣南流至萬城場爲江陵枝江界水
行二十里入江陵境行三十五里至簪箕窪入江按沮水於當
陽枝江界之蕭家店舊分支津西南入枝江境至鷓子口亦曰姚子
入江明萬曆二十五年鷓子口塞而沮水遂并入江陵水落
時僅中流一綫遇山水暴發日漲二三丈奔濤駭浪勢甚狂悍
而下百里洲龍洲天鵝洲江棹洲阻沮西岸使不能南洩遇江
水并發倒灌頂托則楊林磯以上江隄危矣論者謂宜亟疏鷓
子口以殺沮勢當可稍紓萬城隄之急澗水出松滋西南之起
龍北麓西南流行宜都境四十里轉而東南入松滋境至石牌
塘南受紙廠河於是有紙廠河名又東至九龍山下北達支津

行百里至黃家鋪口入江澗水行松滋境共百一十里至獨口入公安境分而爲二北支北匯爲癸巳湖湖南出支津達陳家湖大扁湖又北出支津爲土橋港行五十里北入江陵境行二十四五里至古牆鋪北入江南支自獨口南經申家渡十餘里至管家垸又分爲二西支南行五十里匯牛浪湖又東南二十五六里至泗水口入虎渡河東支自管家垸東南匯陳家湖又東至公安城東北行三十餘里入虎渡河虎渡河者北達大江南達於澧者也自公安城東北行六七里至麻濠口又北行三十五里至金口塘又北行二十四五里入江陵境又北行三十六里至虎渡口達江後漢南郡守法雄有異政猛虎渡江去因名自公安城東南行四十里至泗水口又南行十二里入湖南澧州安鄉境行百餘里入澧公安縣東南有淤泥湖虎渡河

水所匯者也於是自虎渡河之麻濠口東出支津曰白花港行二十四里達薦子溪自虎渡河之金口塘東出支津行二十里至小橋子達薦子溪薦子溪自小橋子北行十二里至斛湖隄達江自小橋子南行五十里至霧溪背市爲公安石首界南行四十八里入湖南安鄉境曰後江曰景港行八九十里入洞庭薦子溪東匯爲陸遜湖實跨公安石首界薦子溪之東有藕池口藕池之東有調絃口均北承江水南注於洞庭者也藕池口在石首縣西北首受江水分爲三支北支中支均分注薦子溪東支南行石首境五十里入湖南華容境曰涌水行六十里會景港入洞庭名景口調絃口在石首縣之東四十餘里分江西南注十餘里入湖南華容境行五六十里經華容縣城東入洞庭此皆江南支津分江水注洞庭以弭江北之患者也按薦子

溪卽古油水故道其上游則爲虎渡河衝決不能復識漢書地理志澠山澠水所出東入繇水經注孱陵縣有白石山油水所出又言公安縣有油水水東有景口卽武陵郡界景口東有淪口淪水南與景水合又東通澧水及諸陂湖繇油蓋一名今薦子溪入湖南安鄉有紫景渡又南至景港塘分爲二支西支至安鄉南入澧卽酈元所謂通澧水也東支至景口入洞庭卽酈元所謂及諸陂湖也但今之景口非古之景口古之景口爲油入景處在北今之景口爲景入湖處在南其所謂淪水者今亦不可復識蓋古今勢異港汊紛岐不無遷徙耳江北之長夏河卽古夏水水經言夏水出江津於江陵縣東南東至雲杜縣入沔今江津久已築塞而入沔故口不能確指長夏河水大抵皆漢水溢出者江汜之名無其實矣府東南之沙市古江津也長

夏河始於沙市之東東匯爲魯湖五種湖鼓湖塞子湖陰陽湖半渡湖三湖白鷺湖計行江陵境百五十里入監利境行百四十里入沔陽境支津北通於漢南達於江均不一處惟江隄旣築無復通江之口矣江水自荆門虎牙以上水爲山東雖湍激直注勢不能溢嘉魚而下江面旣闊水勢漸緩尙可順軌安瀾不至大害惟中間郡縣如江陵公安石首監利諸縣上流承焱疾之餘兩岸處平行之勢而攤沙成洲使江流紆曲不能直下故橫決之患甚烈夾江南北沿岸爲隄南岸自松滋至城陵磯隄亘六百餘里北岸自萬城至拖茅埠隄亘七百里咫尺不堅千里爲壑府境舊有九穴十三口分布於大江南北以分江流唐宋以來漢水漸徙而南沓之支津承江北注漢者反承漢倒灌而注江矣又宋代爲荆南畱屯之計多墾湖渚爲田畝於是

盡塞北岸之口自明以來尙畱郝穴與南岸之虎渡調絃並著
今郝穴亦阻築矣水勢遂趨而南咸豐二年石首有藕池口之
潰十年江陵有毛楊二尖口之潰同治九年松滋有黃家鋪口
之潰光緒十三年石首又有王家大路之潰均南達湖南入洞
庭實恃洞庭爲豬洩之地然聞洞庭邇來漸涇漬沅澧入湖之
口尤甚沅湘間民多墾淤渚築垸爲耕地竊恐桑田旣盛於南
滄海必變於北無論江水北決卽沅澧之水或從而倒灌吾知
雲夢故區當復見於今日矣

江陵縣

沿革

禹貢荊州之地職方爾雅亦屬荊州周莊王時楚文王始都郢
今縣北紀南城也文王後九世平王又城郢而都之卽子囊所

光緒湖北輿地記十二

三

言吳師所入者今縣東北故郢城是而桓十三年之荒谷治父
均在今縣東文十年之渚宮卽今縣城秦爲南郡治所漢高帝
元年改南郡爲臨江郡五年復故景帝二年復改臨江中二年
復爲南郡屬荊州領縣十八在今縣竟爲江陵郢二縣江陵爲
南郡治後漢省郢縣入江陵餘仍舊建安十三年劉琮降魏魏
盡有荊州之地及赤壁之敗孫權使周瑜入江陵領南郡太守
地入於吳十九年吳蜀分荊州南郡爲蜀有二十四年蜀守將
糜芳以江陵降吳南郡復入吳吳徙南郡治江南而江陵爲屬
縣晉武大康元年平吳改南郡曰新郡尋復曰南郡還治江北
江陵仍爲南郡治所而荊州刺史亦自襄陽來治但荊州刺史
亦不盡治江陵王敦治武昌陶侃前治沔陽後治武昌王廙治
江陵庾亮治武昌庾翼治襄陽復還夏口桓温治江陵桓冲治

上明王忱還江陵自忱以後始不復動移又武帝置南蠻校尉於襄陽江左移置於江陵之方城又江左於江陵縣境僑立新興郡領雲中九原定襄宕渠廣牧新豐六縣宋江陵仍爲荊州及南郡治所孝建中罷南蠻校尉府又省雲中九原宕渠入定襄等縣於是新興郡領定襄廣牧新豐三縣屬荊州齊因宋制梁於江陵縣境置都州領雲澤縣又改新興郡之新豐縣爲新興縣餘因之承聖初湘東王繹卽位都於江陵三年西魏遣于謹等襲江陵陷之殺梁主繹魏以荊州一州之地封蕭詧爲附庸立江陵總管府以副之南郡仍屬荊州領五縣治江陵在今縣境爲江陵廣牧定襄安興四縣蓋廢梁新興郡以定襄等三縣屬南郡耳都州領二郡在今縣境爲永甯郡之華陵雲澤二縣華陵當分雲澤縣置後周改荊州總管府曰大義郡總管府

改華陵縣曰紫陵隋開皇九年置江陵總管二十年改爲荊州總管大業初廢總管復置南郡屬荊州領縣十在今縣境三縣曰江陵郡治也卽西魏之江陵縣曰安興爲西魏之安興廣牧定襄三縣開皇初省安興縣入廣牧仁壽初改廣牧曰安興大業初又廢定襄入焉曰紫陵爲西魏之華陵雲澤二縣周改華陵爲紫陵大業初廢雲澤縣入紫陵大業之末蕭詧之曾孫銑起兵據江陵稱梁王東自九江西抵三峽南畫交趾北距漢川銑皆有之唐武德四年平蕭銑改南郡爲荊州治江陵又廢紫陵縣入江陵於是荊州領七縣在今縣境爲江陵安興二縣五年荊州置大總管七年改爲荊州大都督貞觀二年降爲荊州都督府十七年省安興入江陵而江陵疆域與今合龍朔二年復升荊州爲大都督府督峽岳復郢四州天寶元年改荊州爲

江陵郡乾元元年復爲荊州大都督至德以後中原多故襄鄧百姓兩京衣冠盡投江湘故荊南井邑十倍其初乃置荊南節度使治江陵上元元年九月置南都於江陵以荊州爲江陵府長史爲尹觀察制置一準兩京又置長甯縣於郭內與江陵縣並治二年省枝江縣入長甯大厯六年復省長甯入江陵并分置枝江縣而江陵如故爲荊州治屬山南東道五代荊州梁唐晉漢周均爲荊南高氏地均置荊南軍宋爲江陵府江陵郡荆南節度領荊湖北路兵馬鈴轄兼提舉本路及拖夔州兵馬巡檢事建炎二年升帥府四年江陵寄治枝江置荊南府歸峽路荆門公安軍鎮撫使紹興五年江陵還舊治罷鎮撫使始制安撫使兼管田使六年爲經略安撫使七年罷經略止除安撫使淳熙元年還爲荊南府未幾復爲江陵府制置使景定元年移

制置使治鄂咸淳十年爲荆湘四川宣撫使兼江陵府事治江陵縣屬荆湖北路元至元十三年改江陵府爲上路總管府天厯二年以文宗潛藩改上路爲中興路治江陵縣屬河南江北等處行中書省荆湖北道明大祖甲辰年改中興路爲荊州府以江陵縣爲府治屬湖廣行省洪武元年置湖廣分省於荊州府尋罷九年以荊州府屬湖廣布政司尋改屬河南二十四年還湖廣 國朝康熙三年分湖廣布政司爲湖北布政司江陵縣爲湖北布政司荊州府治鎮守將軍暨副都統領滿洲駐防兵駐此

疆域

廣八十七里縱五十九里至 京師陸程三千二百八十里至省治水程七百二十里陸程五百六十里東至安陸府潛江縣

界五十三里西至枝江縣界三十四里南至公安縣界四十一里北至荊門州界一十八里東南至監利石首二縣界一百又九里東北至荊門州界二十六里西南至公安松滋二縣界四十三里西北至荊門州當陽縣界七十五里

天度

附日出入

緯度北極出地三十度二十一分三十秒經度距 京師中綫偏西四度二十六分四秒

冬至日出卯正三刻十三分五十三秒日入酉初初刻一分七秒晝四十刻二分十四秒夜五十五刻十二分四十六秒夏至日出卯初初刻一分七秒日入酉正三刻十三分五十三秒晝五十五刻十二分四十六秒夜四十刻二分十四秒

山

紀山在縣北三十五里爲縣與荊門界郡之鎮山也南有紀南故城說者謂在此山之南故名紀山之西北曰蘇家岡又北曰陳家岡又西北曰朱家嶺紀山之西南曰八嶺山崇嶺八道望之蜿蜒若龍縣境高山惟八嶺與紀山對峙餘皆附婁也西麓有大暉港入出焉八嶺山之西北曰蕭家岡又北曰棗林岡八嶺山之東南曰古龍山上有落帽臺卽孟嘉落帽處也古龍山之西曰西山晉王子猷謂西山朝來致有爽氣卽此又西曰王家坡又西北曰歐家坡古龍山之東南曰大暉山大暉山之東曰岳山寺一曰岳山寨吳大將軍徐達屯兵處也又東曰赤土坡南臨楊藕塘又東北渡水曰孫家山南臨馬子湖又自大暉山入城西北隅曰擲甲山世傳關神武救南郡聞糜芳降憤而擲甲於此者此縣北支山也

三界塚在縣西北六十六里縣與當陽界山也其原自當陽縣香爐山迤邐南行入縣境其東南有清吉寺小支山自三界塚南至王家灣其西南有雙塚廟小支山爲縣與當陽界王家灣之南曰唐家墩其西有鎮頭山小支山臨沮水爲縣與當陽界唐家墩之南曰關家埡又南曰郭家坡又南曰馬山又南至萬城市又東南傍大暉港至城南曰畫扇峰卽荆州記所謂一峰迥然遠而望之如畫扇然者也又東南至東關東有小湖爲太師淵河源東關之東北有諸倪岡倪可福故宅也其北曰袁家觜北臨長湖其東曰萬家腦東臨北湖又北渡水曰二龍岡又東南曰索家嶺自諸倪岡至此爲長湖以南象湖鼓湖以北一小支東關之東曰周家嶺又南曰穆家嶺又南至郝穴北有小湖爲城河水源其東北有陳家

嶺又東南曰王家觜又自郝穴南至周公隄胡家橋水出焉又東南曰趙家嶺其北有白馬嶺又東北曰伍家墩又北曰張家嶺又北曰紗帽腦西臨胡家橋水自白馬嶺至此爲鐔長到河西胡家橋水東一小支又自趙家嶺東至鐔長到鐔長到河出焉其北有鴨棚觜又北曰侯家嶺西臨鐔長到河又東渡河曰黃羅岡又東渡河曰半頭岡臨太倉湖半頭岡之南曰顏家嶺西臨太倉湖又南曰馬長嶺半頭岡之北曰侯家腦此自縣西北迤行至東南支山也

水

江水左岸自枝江縣東南流入縣之西境右岸交松茲縣界東南流六里逕石套子南又東流十二里逕龍洲南右岸亦入縣境龍洲西有洲與下百里洲連按水經注縣江有洲號曰枚迴

江水自此兩分而爲南北江也又曰下龍洲今此洲在龍洲上當卽枚迴洲但北江淤塞故今江水全行洲南耳江水又東流四里逕星官廟南有支津出右岸飛鐘山西

飛鐘山西支津自江南出一里有古牆鋪水源出松滋縣魯家阡北東流二里逕同大院北入縣境在縣城西南二十八里轉而北流五里又東流二里逕古牆鋪北有橋縣境西出松滋官路也又東少北二里來注旣受古牆鋪水又南流四里逕保一院西又南流四里半逕普安寺東又南流三里逕天保院東北又南少東一里逕謝家岡西又南少西流五里逕竹枝院東又西南流三里入公安縣界匯爲大扁湖南流注虎渡河今敘其在縣境者

江水又東流七里至虎渡口亦曰太平口有支流南出曰虎渡

河南流逕公安縣至澧州入澧水卽禹貢所謂東至於澧也

虎渡河自江南出五里逕化成寺西又南流十里逕泰山廟東北轉而東流二里又南少西流三里逕觀音寺東南又南流八里逕饒家工東又南少東流三里許有橋縣境南出公安官路也又南流里許逕戴家場西又南少西流三里入公安縣界

江水又東流二里逕天鷲洲南天鷲洲在龍洲之東水經注龍洲東有寵洲當卽此洲江水又東少北流六里許逕筭箕窪之南新淤洲之北有沮水自西來注筭箕窪卽水經注之馬牧口但故瀆今爲沮水所奪新淤洲橫亘江南岸東西長十里按水經注江水又東逕燕尾洲北東得馬牧口下繼之曰又東逕江陵縣故城南江陵故城今縣治也今新淤洲在縣城南稍西筭

箕窪在其北少東江水逕其北其卽燕尾洲明矣

沮水源出保康縣南東南流逕南漳遠安至當陽縣會漳水南流入縣之西北境距縣城七十五里池而東流二里逕孫家場北有鍾家港自當陽西南流入縣境南流一里來注沮水又南少西流三里逕張家渡復入當陽縣境又南流四里逕木蘭湖西又南流二里逕石家渡轉而東南流五里逕台家渡之東鎮頭山之西仍入縣境又南少西流四里至唐家口有暑子河源出當陽縣南之明月山合諸小水南流左入縣境右爲枝江縣入界處在縣城西北六十四里南少東流二里逕屈家湖南右爲當陽縣懸插枝江東北偏地又池而東流三里許至唐家口注沮水沮水旣受暑子河水又南流入當陽縣懸插枝江東北偏地六里逕伏家場西又西南流

四里許有東西湖水自枝江東南流出界又東南流一里來注沮水又南少東流四里南少西流三里西出支津流里許入枝江縣匯爲袁家湖南流入江詳枝江篇旣出支津又南流入里逕蔡家湖西有柳港西南流來注詳當陽篇沮水又轉而東流五里右逕枝江縣境又東流里許右出支津逕蕭家店西又南流至於鷓子口入江鷓子口亦曰窰子口卽北魏時沮水入江之口詳枝江篇沮水又曲而南流四里許逕萬城市西左入縣境又南流六里左逕來福寺西右有港西北通蕭家店西支津又南流四里右得瓦窰湖水東北流來注又南流九里左逕上漁埠頭西右亦入縣境矣自萬城市至此沮水皆左傍萬城隄行爲縣與枝江界又東南流二里逕滄港塘北又迤而東流十四里逕龍洲北又東少北流八里又東逕天鷺

洲江桿洲北流十一里至筭箕窪南注於江此明代後沮水入江之口也阮文達謂水經注沮口爲今萬城隄外沮水入江之口攷北魏時沮水本由今枝江窰子口入江迄明萬厯時因沮水汎溢贅壩塞之始改道出今之筭箕窪不得泥當今沮水入江之口爲古沮口也

江水又東流四里逕城南御路口又東少南流八里許逕沙市南沙市舊有口今淤塞雷思需方輿書謂江水逕御路口東播於沙市津巷口卽古江津口者是也沙市之西有洲橫踞江中曰窰金洲自西至東約八里廣二里略似半橢圓形江流至此分而爲二洲南爲分派流至洲東頭復與洲北正流會江水又南迤東流十四里逕柳家洲西江中有江心洲南北長十二里分江流爲二洲東爲正流按水經注江水左池爲中夏水右則

中郎浦出焉夏水篇云江津豫章口東有中夏口夏水之首江之汜也江津在今沙市今柳林洲居沙市之下又爲江水左池處當是中夏口地但其口已爲江隄所障故今夏水僅存下游耳江心洲之西爲江水分派傍右岸而行廣僅半里長同洲則所謂中郎浦者當在此矣江水又南迤西流十里逕鎮江寺之西鄔家廠之東與江心洲西分派會又西南流十二里逕長樂隄西去左岸一里有突起洲斜踞江中長九里廣二里洲西爲江水正流東爲分派江水又西南流六里逕文村塘之西西湖廟之東與突起洲東分派合右岸入公安縣境又南流八里南迤東流三里逕青安洲西又南迤西四里逕二聖洲西江水自會江心洲西分派右迤至此因青安二聖兩洲西伸屈曲而行當卽水經注所謂江浦右迤南派屈西極水曲之勢世謂之江

曲者也江水又南流四里有支津出右岸卽湖隄東詳公安篇又轉而東少北流七里東南流八里逕馬家砦南又東流七里逕雙聖潭南去右岸半里有白沙新淤等洲縣亘江中上起雙聖潭之西南下盡石首黃水澮之東北長四十四里廣四五里略如弓形江水至此分爲二行洲東者正流行洲西者爲分派廣僅半里傍右岸流至石首洲盡復會於正流江水又東迤南流二十里半逕郝穴西又南流二十二里逕洪水淵西南左岸入石首縣界右岸亦離公安入石首矣按江水發源藏外透池數千里流至縣境又有沮水助其怒歷多潰決之患故隄防甚重今左岸隄自中斗篷至文村塘長五十二里自馬家砦至洪水淵長四十四里皆江水傍行之隄文村塘之南馬家砦之北亦有隄一段但離江已七八里右岸隄自虎渡口至松滋界長十二

里自周家土地場至西湖廟長四十六里亦江水傍行之隄虎渡口東周家土地場西亦有隄一段離江二三里總而計之江北大隄西北起萬城市東南盡拖茅埠共長二百里江南大隄南起西湖廟西盡松滋界共長五十八里隄名甚繁隄段甚眾茲附敘其大略焉

長夏河在縣東偏南八十里上承大暉港水南流入監利縣大暉港源出縣西北三十里之八嶺山西麓卽晉元嘉中所開漕河上流也自八嶺山西流二里許逕孫家彎北又南流九里逕萬善寺東又南少東流二里曰皮家河又南流二里迤而西流二里至梅槐橋爲縣境西北出當陽官路又西南流三里屈而東流四里逕鄭家台南又南少東流三里許又南流二里逕羅家廟西轉而東流一里又東北流二里又東

屈曲流七里逕彭家場南又東流五里又東北流四里至秘師橋又東北流四里逕李家灣東轉而東流五里又東南流六里許逕龍山寺北抵城西分爲二支北支依城東北流二里逕大暉山東南又東北流一里至城北門又東流六里轉而南流一里半至城東門與南支會南支依城南流一里半轉而東流四里許至城南門又東池南流三里許轉而北流一里半至城東門與北支會二支既會又東流半里轉而南流一里逕畫扇峯東北又東南流一里半至安心橋又東南流四里逕中關北有支流南出口沙市河繞沙市行六里至沙市東南豬蓄爲湖周不足一里停泊往來舟楫旣出沙市河又轉而北流四里西北流一里又轉而東北流二里逕草市南又東曲折流三里逕楊泗廟西又東北流二里匯爲揚

藕塘東匯五里至馮家台之西北赤土坡之東南有汊北匯約一里又自汊口東匯一里半爲港東北流一里逕關沮口北白廟子南匯爲馬子湖自北廟子西北匯三里至余家窪之東北孫家山之西南孫家山東倚大地西臨湖距余家窪約二里又西北匯二里至龔家腦背背北爲海子湖又西北匯七里至高家灣東背背南有汊東匯一里許及高家灣東南背北有港曰楊水西行九里至龍陂橋爲縣境北出荆門州官路又西行四里西北行八里至郭家店東入荆門州境東通長湖按水經注之楊水舊發源於紀山北今湮塞此乃海子湖通長湖之港不過因爲楊水故道尙存其名耳湖水又自高家灣東背北匯三里止於吳家灣自白廟子東匯二里至王家台背背西有汊東匯約一里又自王家台背東匯

二里至黃家院觜觜東有汊東南匯一里半又自黃家院觜東北匯二里半至太白湖東觜對太白湖西觜相距約二里兩觜間卽太白湖長湖南解也按太白湖西之馬子海子兩湖均是長湖之別解不過隨地異名耳又東北匯二里至袁家觜觜北湖面漸闊爲長湖矣又自袁家觜渡太白湖口西北匯二十六里至王家灣西北長湖西南岸也又西匯有港通海子湖爲荊門州境矣又自袁家觜東匯三里至宋家場觜觜東有汊曰北湖南匯八里及觀音壩東西最闊處約三里小汊皆不足一里又自宋家場觜渡北湖口凡二里至楊林口西北觜觜北有汊東北匯僅里許又北渡汊口匯八里至龍口觜又東匯十五里至天心觀中間小汊紛歧惟西近龍口觜及東近天心觀兩汊稍長闊近龍口觜者汊口寬二

里西匯約一里半近天心觀者汊口寬二里南匯一里又自天心觀東匯四里至馬家壩北觜觜西有汊南匯一里半及余家觜塘汊口外又曰瓦湖亦隨地異名耳又東匯一里有支津南出曰流河南流八里至錫家壩北注丫角廟河又渡流河口東少北匯四里至大白洲又東少南匯三里至小白洲有支津南出曰丫角廟河爲長湖南出之正流自袁家觜至此長湖南岸也又東匯入荊門州界按長湖南跨縣境北跨荊門州東西闊四十三里南北闊二十四里入湖之水以大暉港陳家嶺河爲巨大暉港出縣西北山之水也陳家嶺河出荊門州西北山之水也陳家嶺河之西有伍家河東有宋家嶺水其源不甚遠均由荊門州境入湖湖之出港凡三在荊門者由湖東出流逕潛江通三汊河在縣境者由湖南

出曰流河曰丫角廟河流河注丫角廟河者也故當以丫角廟河爲正流丫角廟河自湖出南流一里又西南流三里逕菱角洲南又迤而南流五里逕錫家塢東北與流河會轉而東少南流四里逕丫角驛西有橋縣境東達潛江官路也又南流四里迤而西南流八里逕張家場東有支津出王坡嶺北南少西流六里注童家河既出支津又迤而東南流六里逕胡家院西有大師淵河源出縣東南十六里之東關東小湖東流二里逕王本分橋又東流二里至妯娌橋轉而北流二里又東流二里逕陳家台東北又轉而北流三里逕大師淵東又東北流二里匯爲象湖東匯三里至李家腦西北北有倒口橋水南流一里來注又東匯四里至張家台東北玉壺寺西南又東匯四里有相思橋水源出昌馬塢西南流一

里許至相思橋又西南流三里半至諸倪橋又西南流半里來入又渡相思橋水口東匯一里爲港象湖南北闊三里東西闊十二里入港東流半里有橋通之曰陟屺橋又東流半里匯爲五種湖自陟屺橋港口南匯四里有汊西南匯約一里半又自汊口東南匯二里有汊南匯曰穀湖穀湖東西闊二里南北闊一里許口門僅半里又自穀湖口轉而北匯三里又轉而東匯三里半有港東通潘泊湖自陟屺橋港口至此五種湖南岸也又自陟屺橋港口東北匯四里至黃屯寺南又轉而東南匯五里至通潘泊湖港口此五種湖北岸也又入港流半里許匯爲潘泊湖東匯三里至金家台東北爲港潘泊湖南北闊約四里南岸凡二汊西汊南匯一里汊口闊一里東汊東南匯一里汊口寬半里許又入港東流二里

有港北通黎光湖及滾子蕩湖又東流一里東有二小漢一
漢闊約一里一漢闊約半里又南流一里匯爲豉湖自港口
傍湖西岸西南匯九里至百子菴東中間凡三漢惟近百子
菴一漢稍闊西北匯二里漢口寬一里許又自百子菴東匯
三里至白瀆院東北觜觜東有漢南匯約一里又東南渡漢
口匯七里半有港出王坡口北爲豉湖南出之正流又自潘
泊湖入湖港口傍湖東岸東南匯三里至唐家小洲有漢北
匯二里及馬港鋪南又南匯一里至唐家小洲西南觜觜東
北有張碧瓦湖在丫角廟南四里東西闊二里南北闊二里
半西有港流半里至周家台南轉而南流二里至黃老台北
又東南流二里匯爲漢入豉湖豉湖又南渡漢口凡一里半
至老黃台前觜觜東南有漢北匯約二里又渡漢口東南匯

三里至張家場西又西南匯五里至王坡口北港口豉湖東
西闊十三里南北闊十里入港南流一里至王坡口曰童家
河有城河源出縣東南七十八里之郝穴北小湖北流八里
逕石家莊東轉而東流二里曰熊家河又轉而北流八里逕
郝家台西又轉而西北流八里至薛家河口有港東通胡家
橋水又北少西流六里逕資福寺西又西北流十八里又北
流三里逕岑河口市東又北少東流二里至三漢口有西漢
湖水東南流四里來注又轉而東流四里東北流二里逕劉
王店南又東曲折流八里轉而北流二里逕朱家灣南又東
流八里注童家河童家河既受城河水又南流半里與王坡
嶺支津會又南流四里轉而東北流七里至胡家院東注丫
角廟河丫角廟河又東流三里至滑河橋有三漢河支津曰

潛江縣三汊河分支西北流二里迤而西南流一里又轉而東南流三里入縣之東境距縣城六十里又轉而西南流二里至魏家橋又西南流二里至楊家橋又西南流二里轉而南流七里至余家橋又東南流二里至黃家橋迤而南流一里又西流二里至滑河橋東注丫角廟河丫角廟河又東南流七里至清水口匯爲三湖自清水口西匯三里至龍家場觜觜東有汊北匯約一里觜西有汊北匯約一里半汊西有觜東南距龍家場觜約二里又自汊觜南匯六里至定相寺東觜又東南四里至胡家橋水口自清水口至此三湖西岸也南有胡家橋水出縣東南九十四里之周公隄東北東北流二里又北流二里至胡家橋又北少西流四里至新興橋又北流五里半至聶家橋又東北逕新興院東流十四里至

張金華橋又東流二里逕金枝寺北又東北流四里逕譚家井東又北流四里逕張家嶺西又北流二里逕紗帽腦西又北流二里逕胡家場西北東有港通鐔長剏河轉而西流三里又北流二里至大河口有港西通城河又北流二里許逕普渡寺東又北流二里許逕洪家台又北流三里許逕王家灣南折而西流一里許至徐家口又北流三里逕王家台西又北流一里至汪家院東南入三湖三湖又自胡家橋水口東匯八里至三家門閘又東匯四里至新河口有支津東出二里至南馬院注鐔長剏河自胡家橋水口至此三湖南岸也又自新河口北匯二里至余家觜又北匯二里至大山院西觜又東北匯三里至徐家鋪觜觜南有港東出爲長夏河三湖東出正流也觜北有涂家河自宋家場河分支西南流

來注又自徐家鋪觜轉而北匯六里至左家院觜又北匯二里至開府院觜兩觜間有小汊東南匯約半里又自開府院觜東匯四里至清理院西北有港北通盧家橋港又轉而北匯二里至果河洲觜又東匯二里至雷家場西北曰塞子湖三湖之東北澥也又轉而北少西匯三里許至盧家橋觜觜北有盧家橋港自宋家場河分支西北流來注自新河口至此三湖東岸也又自盧家橋觜轉而西匯四里至東洋院觜觜東有汊西北匯約一里又西匯二里有管家河自潛江縣東南流入縣境南流四里來注又自管家河口西匯四里至西洋院東南有汊北匯半里及西洋院又渡汊口西匯五里許至楊家橋西南爲陰陽湖三湖之西北澥也自盧家橋觜至此爲三湖北岸又南匯四里至余家橋東北又轉而東匯

三里至黃家橋東觜又轉而南匯三里至江天寺又南匯四里至清水口自楊家橋西南至此亦三湖西岸也三湖自東至西相距一十二里爲東西闊之極數自南至北相距二十里爲南北闊之極數入湖之水以丫角廟河爲最巨出湖之港以長夏河爲正流長夏河旣受三湖水東流三里許至王宗口西有宋家場河自潛江縣西荆河出南流入縣境西距縣城五十九里南少東流八里至黃莊有支津東出匯爲返彎湖北岸屬潛江南岸則爲縣境自匯口傍湖南岸東匯四里至周家溝北迤而東南匯三里至關壯院北又東匯四里有支津南出曰么湖南流十六里逕龍彎司西又南流十里注大倉湖又自么河口東北匯一里許至馬腸院觜轉而東南匯三里又南匯六里至羅家場東南爲張家湖返彎湖之

別澥也又轉而東北匯四里又北匯四里至黃家橋西北觜
觜南有港出黃家橋湖水南流入白鷺湖之港也又渡港口
東北匯二里至熊口又北匯入潛江縣境湖東西闊約十九
里西受宋家場河水南由黃家橋港入白鷺湖黃家橋港自
湖南出流二里至黃家橋又南少西流三里至何家腦西又
南流十里至曾它口東出支津匯爲荻湖荻湖東西闊十二
里南北闊十里南有港出姚家橋流二十四里至羅家壩注
於監利之羅塘港黃家橋港又南流十九里至李家場東又
南流一里迤而西流二里又南流二里有支津西出流二里
至老塘又折而東南流四里注白鷺湖黃家橋港又東南流
十里逕伍家場入白鷺湖宋家場河既出返彎湖支津又南
少西流四里逕方家觜南有港出曰盧家橋港西流一里半

又西流二里至洪家場有港西南通三湖長八里又轉而西
北流半里又迤而西南流二里又西北流二里至盧家橋入
塞子湖宋家場河又南流二里逕宋家場東又西南流半里
逕韓家腦西有支津出曰涂家河西流六里逕窰灣東又南
流一里西流一里至三官橋又西南流四里逕林家彎北又
折而南流一里又西流一里注三湖宋家場河又南流四里
轉而西流二里逕皮家台北又西南流二里逕土地口西又
西南流三里至張家渡又西南流二里至王宗口注於長夏
河長夏河又南流四里逕張金河市西左家院東有鐔長到
河出縣東南一百三里之鐔長到北東北流五里又北屈曲
流二里至張家河轉而東少北流三里又轉而西北流一里
逕周家洲東又北流三里逕李家口東北轉而西北流二里

至桐南口又北流四里逕金家灘東又北流二里逕張家觜
東又北少東流七里又北流七里曰高家河轉而西北流二
里逕龔家灣北曰鐵匠溝又轉而西南流三里至楊家口又
轉而西北流三里至李家口有港西通胡家橋水又西北流
七里北流二里曰楊家河折而東流一里又北流二里逕侯
家嶺東轉而西流二里有橋曰文家橋又西南流二里轉而
西北流二里又北少東流二里逕南馬院南與新河口支津
會又東北流三里逕張金河市西注長夏河長夏河又南流
二里逕東洲院北迤而東少南流八里逕陳家洲北又東流
二里東南流二里至易家口又東南流二里逕羅家台西又
南流二里至小河口有支津西出徐家台北南流十四里注
白鷺湖之東澥既出支津又南流四里許至高家口有支津

出廖家台北南流十里注白鷺湖之東澥又南流三里迤而
東南流一里逕興城院南又迤而南流四里至陳家河東匯
爲白鷺湖自河口南匯三里許至彭家台前觜觜南有汊北
受長夏河出徐家台北廖家台北二支津東匯來注白鷺湖
東澥也汊自口門至西岸相距約七里自南岸至北岸相距
約四里汊口之南有觜西北對彭家台前觜距三里又自汊
觜南匯八里入監利縣界中間凡二汊北汊西匯二里南汊
西匯二里半兩汊間有觜正對東岸黃家橋港口相距十六
里爲湖面東西最闊處自長夏河口北匯五里至袁家院東
又北匯三里至吳家院南有汊北匯約半里又渡汊口東匯
一里轉而北匯二里至吳家院東觜又西匯一里轉而北匯
五里至孫家院東觜觜東爲大倉湖白鷺湖北澥也觜北與

返彎湖南出之么河會又渡么河口東北匯四里至柴家河
南對監利屬之南岸相距三十八里爲湖面南北最闊處又
東南匯二里至半頭岡南觜又南匯二里至顏家嶺北觜兩
觜間有汭東匯一里及半邊院又池而西南匯四里至顏家
嶺西觜又南少東匯十里至秦家剝有汭北匯約一里又自
秦家剝南匯八里至新河口與黃家橋港西出之支津會又
東南匯六里至伍家場西與返彎湖南出之黃家橋港會又
南匯三里入監利界按白鷺湖北跨縣境南跨監利西北受
長夏河水東南流入監利境仍爲長夏河長夏河卽水經之
夏水水經曰夏水出江津於江陵東南又東至雲杜縣入沔
今出江之口已塞僅存下游上承大暉港水南流逕監利沔
陽東通漢陽縣之長河至沌口入江不入沔矣

東荆河自潛江縣南流至縣東之直路河市入縣境距縣城
一百一十七里南流五里有嚴家河自潛江南入縣境南少
西流一里來注又南流十里左岸仍入潛江境右岸入監利
境有支津西出曰羅塘港詳監利篇按東荆河漢水支流也自潛
江吳家改口南出曰夜汭河至新灘口分爲二支東支爲東
荆河南流過縣境逕監利入沔陽茲敘其在縣境者

鄉鎮

縣有市集二十五鄉五里一百二十五

草市在城東四里丫角廟市在城東五十五里張金河市在城
東六十九里宋家場市在城東七十五里岑河口市在城東三
十五里直路河市在城東一百一十七里秘師橋市在城西十
二里梅槐橋市在城西三十二里萬城市在城西三十五里李

家埠在城西十八里御路口市在城南五里彌陀寺市在城南二十二里十里鋪市在城北十里沙市在城東南十三里郝穴市在城東南七十八里資福寺市在城東南六十里龍彎市在城東南八十七里胡家場市在城東南八十四里彭家場市在城東南六十六里祁家場市在城東南五十五里普濟觀市在城東南九十五里譚長剝市在城東南一百有三里熊家河市在城東南六十九里拖茅埠市在城東南一百有九里筭箕窪市在城西南六里

鄉在城東者曰東鄉在城西者曰西鄉在城南者曰南鄉在城北者曰北鄉在城東南者曰東南鄉

里一百二十五曰府一里曰府二里曰府三里曰府四里曰府五里曰府六里曰府七里曰府八里曰府九里曰馬一里曰馬

二里曰馬三里曰梅一里曰梅二里曰官一里曰官二里曰官三里曰官四里曰官五里曰龍一里曰龍二里曰龍三里曰龍四里曰龍五里曰都一里曰都二里曰都三里曰上一里曰上二里曰上三里曰中一里曰中二里曰中三里曰中四里曰中五里曰地一里曰地二里曰諸一里曰諸二里曰諸三里曰諸四里曰丑一里曰丑二里曰丑三里曰丑四里曰丑五里曰丑六里曰譚一里曰譚二里曰譚三里曰譚四里曰譚五里曰譚六里曰譚七里曰譚八里曰譚九里曰化一里曰化二里曰化三里曰化四里曰化五里曰井一里曰井二里曰井三里曰井四里曰陽一里曰陽二里曰陽三里曰陽四里曰陽五里曰文一里曰文二里曰文三里曰文四里曰文五里曰日一里曰日二里曰日三里曰日四里曰日五里曰日六里曰高一里曰高

二里曰高三里曰高四里曰陞一里曰陞二里曰陞三里曰陞四里曰陞五里曰旦一里曰旦二里曰旦三里曰旦四里曰旦五里曰旦六里曰旦七里曰旦八里曰沙一里曰沙二里曰沙三里曰沙四里曰沙五里曰丙一里曰丙二里曰丙三里曰丙四里曰丙五里曰丙六里曰丙七里曰丙八里曰丫一里曰丫二里曰丫三里曰丫四里曰丫五里曰邊一里曰邊二里曰邊三里曰邊四里曰邊五里曰在一里曰在二里曰在三里曰在四里

中斗篷汛在城南五里李家埠汛在城西十八里橫堤汛在城南二十八里

東路五鋪自城八里至棗岡鋪又六里至白水鋪又八里至諸倪岡鋪又十里至蔣港鋪又十里至馬港鋪又六里至潛江界

光緒湖北輿地記十二

三

西路二鋪自城三十六里至新橋鋪又五十二里至新興鋪抵當陽界

南路四鋪自城十二里至沙市鋪又十里至安市鋪又六里至小江鋪又十八里至下砦鋪又十四里至公安界

北路一鋪自城十一里至龍陂鋪又二里至荊門州界

橫路四鋪自小江鋪十里至夾洲鋪又九里至三元鋪又八里至虎渡鋪又八里至古牆鋪又三里至松滋界

職官
知縣 縣丞 駐角廟 教諭 訓導 主簿 駐郝穴 巡檢三員 一駐沙市一駐

龍灣市一 典史 城守參將 守備 千總 把總三員 隄
駐虎渡口 防營千總 駐中斗篷 外委 駐李家埠 額外外委 駐橫隄
鎮守將軍 左翼副都統 右翼副都統

分巡荆宜施道
知府 清軍同知 理事同知 通判
駐沙市 教授 訓導 經
厯

光緒湖北輿地記十二

三